



09. marts 2012

UPA 2012/124

Inatsisartut Suleriaasianni § 36 naapertorlugu apeqquteqaat aallaavigalugu imatut oqallisisissiamik saqqummiivugut:

Meeqqat atuarfiata ingerlalluartumik angusaqarfiusumillu tunngaveqartumik ingerlari-aqqinnissaanut periutsit aammalu misilitakkat suut aallaavigalugit ingerlariaqqittooqarnisaanut apeqquteqaat aallaavigalugu Inatsisartuni oqallinnissamik siunnersuut.

(Siumup Inatsisartuni ilaasortaatitai)

Tunngavilersuut:

Siumup anguniagaraa nunatsinni innuttaasut tamarmik ilinniartitsinikkut atugarissaarfiusumik tunngavilimmik tamanut atugassaqartisinissaq. Nunarput naalagaaffinngoriatornerani ilinniarluarsimasut aammalu innuttaasut sulisussatigut imminut pilersortut pilersinnissaat anguniakkatta pingaannerit ilagaat.

Ilinniarluarsimassutsip anguniarnerani meeqqat atuarfiat tunngaviuvoq pingaernerpaq. Ilinniagaqarsornikkut, atugarsornikkut, kisitsinikkut, inuiaqatigiilerinermi assigisaanilu tamani ilinniagassatigut meerartatta alaatsinaattuullutik, ilinniagaqarusussuseqarlutik, soqtiginnillutik aammalu atuarfigisamik piginneqatigiiffagalugu misigisimanissaat anguniagassatta nuimanerit ilagaat.

Atuarfiulli meeqqat ilinniagassaasa tamakkiisut pissarsiarisarnerai nalilersortuagassaraarput pitsangorsartuagassaraarpullu. Meeqqat atuarfiani angusat kingullit takutippaat angusatigut pitsaassuseq appasippallaarujuussuartoq.

Siullertullu oqaatigeqqaarlarput una: Ukiuni 30-ini nunatta ilinniarsimassutsikkut angusai aatsaat taama annertutigaat, ilinniarsimassutsikkut aatsaat taama qaffasitsigisumik angusaqarsimavugut, ukiut tamaasa ilinniakkaminnik naammassitsillutik piareersut amerliartuinnarput.

Ukiut 30-it matuma siornatigut tusarsimanngilagut kalaallnik nakorsanik, kalaallnik timmisartortartunik, kalaallnik inatsisilerituunik, kalaallnik pisortanik assigisaanillu. Ullumikkulli amerlaqaat kalaaleqativut qaffasissumik ilinniagaqarsimasut inuiaqatigiinni pigilersimasavut.

Pilluarujussuarlik inuuusuttavut piumassuseqarlutik periarfissat ilinniagaqarnissamut atorluarlugit imminut pilersorsinnaassutsimikkut tunngaviliilluarnerenik aamma pinngitsoorusunngilagut ilinniakkaminnik taakku naammassitsinissaanut aqqutissiuusseqataasimasut pilluaqqussallugit.

Anneruumik angusaqarluarluta suli amerlapput angusaqarluarnerunissamik neriuuteqarlutillu aqqutissiuunneqartariaqartut. Suli amerlavallaarput meeqqat atuarfiannit anisartut angusamikkut ilinniagaqaqqinnissaminut inorsartunik aammalu piareersimanngitsunik.

Pisussaavugut ingerlataq torrallanneqarsimanngippat imaluunniit anguniakkamut uniuuttumik ingerlappat ilorraap tungaanut saatinniarneqarnissaanut sulissalluta aqqutissiuussissallutalu.

Meeqqat atuarfiata ingerlalluarnissaanut pingaaruteqarluinnarpooq iliniartitsisoqarluarnissaq. Ilinniartitsisut ilinniartitsinissaminut atugarissaartut aammalu nukissaqarluartut. Pingaaruteqarluinnarpooq ilinniartutuitta atuarfimmik pigisutut misigisimatinneqarnissaat aammalu taakkua inuunerata pitsasumik siunnerfeqarnissaa anguniarlugu piunera ilisimatissallugu.

Avatangiisit, anguniakkanik piviusunngortitsisussat, atortussat tamarmik pingaaruteqarluinnarput. Atuarfiullu ingerlalluarnissaanut pingaaruteqarnerpaamik taaneqarsinnaasoq ataasiinaq tikkassal-lugu eqqortuunngilaq, kisiannili peqqutit aammalu pingaarutillit amerlasuut ataqtigiinnerat pingaa-ruteqarpoq.

Atuarfiup ingerlalluarnissaanut tunngatillugu amerlasuutigut ilinniartitsisut aammalu atuarfiup siuersuisui qitiutinneqartuartarpot. Isumaqaqarnaporlu apeqqusernarlunilu oqallinnermi meeqqat nam-minneq oqaassisaa sumiinnerat ujartussallugu aammalu meeqqat angajoqqaavisa oqaassisai akisu-saaffallu sumiinersoq apeqqusissallugu.

Meerartatta angerlarsimaffimmi ilinniagassatigut ikorfartorneqarnera angerlarsimaffimmi qanoq pitsaatigaa aammalu ilinniagassatigut ikiorserneqarsinnaanngiffiini qanoq periuseqarpugut ikorsiis-suteqarniarnitsinni. Ataatsimoortumik ilinniagassalereqatigiinnermik taallugu angajoqqaat peqataaf-figisinnaasannik neqeroortarialissaagut imaluunniit tamakku tamaasa ilinniartitsisumut akisussaatis-savagut.

Ilinniartitsisunit oqaatigineqartarpoq meeqqat immikkut ittumik pisariaqartitsisut amerliartuinnartut aammalu ilinniartitsisut ilinniartitsiniarnerminni annertusiartuinnartumik meeqqat immikkut pisari-aqartitsisut isumagisariaqarnerisigut ilinniartitsinerup pitsaassusaanut annertuumik sunniteqartoq imaluunniit sunniateqarnerluttoq. Pisortat oqartussaaffiini meeqqat atuarfiat pillugu suleqatigiinner-put naammaginartumik ingerlava aammalu pitsanngorsaasoqassappat aqqutissat pitsaanerit suuppat piffissaq qaninnerusoq ungasinnerusorlu isigalugu.

Neriuprugut Inatsisartut meeqqat atuarfiat pillugu oqallilluarumaartut aammalu isummersuutit tamarmik tikilluaqquneqarlutik ingerlariaqqinnissami atorluarneqarumaartut.